

քաղաքական, ՚ի քննութիւն իշխանութեան Անտիոքայ. Լեւոն անդաստին ՚ի սկզբանն՝ բողոքեաց յատեան Քահանայապետին, որպէս եւ գրէ առ նոյն, եւ վկայս կոչէ զպատրիարքն Անտիոքայ, զզլիաւորս երկոցուն կարգաց ասպետացն եւ զմիանձունս Մեաւ լերին: Նուիրակն Պետրոս երիս ինչ առաջարկեաց երկոցուն վիճողացն. նախ, կամ խօսել եւ իրաւախոհ լինել ընդ միմեանս. այս անհնարին եղել. երկրորդ, զի յանձն արասցեն զվճիռ դատի իւրեանց յինքն եւ յընկեր իւր Սոփրետոս. եւ այս եւս մերժեցաւ. ապա զերրորդն առաջի արար, զդատողական իշխանութիւն իւրեանց՝ տուեալ ՚ի Քահանայապետէն, ցուցանելով զկոնդակ սորա, եւ յորդորելով՝ զի արասցեն զոր կամին: Յանձն առնոյր Լեւոն անսալ վճռի նոցուն՝ եթէ նախ ՚ի բաց հանցեն զյափշտակողն Պեմունդ՝ յամենայն սահմանաց քաղաքին, եւ ապա դատ արասցեն: Ոչ իրաւացի համարեցաւ զայս նուիրակն, եւ ասէր ցթագաւորն՝ այլ ինչ թելադրել. յայն ժամ շնորհ կալեալ Լեւոնի ասէ. «Դուք կարդինալքդ՝ նուիրակք էք Սրբազան Պապին, եւ ես թագաւոր Հայոց. յանձն առնեմ ձեզ զխնդիր թոռին իմոյ եւ զօր նորին. այնպէս դատ արասջիք՝ որպէս առնէր Սրբազանն, եթէ յանդիման լինէաք նմին՝ վասն որբոյս այսորիկ եւ այրոյս. եւ ում իրաւացի դատիք՝ նմա եղիցի Անտիոք»: Այսպիսի ինչ առաջարկելով եւ Անտիոքացոց, փոքր ՚ի շատէ հաւանեցուցեալ՝ պատուիրեաց նուիրակն երկոցուն կողմանց՝ մի՛ եւս վիճիլ եւ հակառակել, մինչեւ կատարեսցեն զքննութիւնն. եւ դարձաւ ՚ի Պտղոմայիս: Անդր հաւաքեալ եւ թագաւորն Երուսաղեմի, եւ բամբիշն Ֆլանտրայ Մարիամ՝ կին Պալտուինայ՝ (յետ սակաւուց) նորոյ կայսեր Կ. Պօլսի, կարգապետք ասպետաց, եւ ամենայն աւագանին՝ ստիպելին զնուիրակսն՝ ամենայն փութոյ պնդութեամբ ջանալ բռնադատել զվիճողսն ՚ի հաշտութիւն խաղաղութեան: Վասն այսորիկ առաքեցաւ եպիսկոպոսն Կրեմոնայ (Սիկարտ) աւարտել զգործն. եւ եկեալ պահանջեաց յերկոցուն կողմանց զրով խոստումն զինադուլ առնելոյ, տալոյ եւս գրաւ եւ պատանդ հաւատարմութեան խոստմանցն՝ մինչեւ հատցի վճիռն. սպառնացեալ՝ ընդ բանիւ առնել զստունգանողն: Յանձն էառ թագաւորն զպայմանսն. խոստացաւ զինադուլ առնել ցաւորս քառասուն, եւս եւ հաճեցուցանել զՏաճարականսն: Իսկ կոմսն ոչ բանիցն հաւանէր եւ ոչ ՚ի կոչն գայր. յայնժամ պատգամաւորն Լեւոնի՝ Կոստանց Կամարտիաս, յուշ առնէր նուիրակին՝ զոր ասացն, ընդ բանիւ առնել զանհաւանն, որպիսի էր կոմսն յամառեալ: Այլ նուիրակն զանգիտեաց